

四庫全書

史部

# 欽定四庫全書

史部

春秋戰國異辭卷十一

詳校官編修<sub>臣</sub>曹錫齡

編修<sub>臣</sub>張謙覆勘

總校官庶吉士<sub>臣</sub>倉聖脉

校對官典簿<sub>臣</sub>郭祚熾

謄錄監生<sub>臣</sub>潘炯

欽定四庫全書

春秋戰國異辭卷十

右春秋右諭德陳厚耀撰

晉

襄公

晉襄公元年春秦師過周無禮王孫滿譏之

詳左傳

兵至

滑鄭賈人弦高將市于周遇之以十二牛勞秦師秦師驚而還滅滑而去晉先軫曰秦伯不用蹇叔及其衆心

此可擊欒枝曰未報先君施於秦擊之不可先軫曰秦侮吾孤伐吾同姓何德之報遂擊之襄公墨衰經四月敗秦師於殽虜秦三將孟明視西乞弼白乙丙以歸遂墨以葬文公文公夫人秦女謂襄公曰秦欲得其三將戮之公許遣之先軫聞之謂襄公曰患生矣軫乃追秦將秦將渡河已在船中頓首謝卒不反後三年秦果使孟明伐晉報殽之敗取晉汪以歸四年秦繆公大興兵伐我渡河取王官封殽尸而去晉恐不敢出遂城守五

年晉伐秦取新城報王官役也六年趙衰成子欒貞子

咎季子犯霍伯皆卒趙盾代趙衰執政

史晉世家

晉襄公使人於周曰敝邑寡人寢疾卜以守龜曰三塗

為祟敝邑寡君使下臣願藉途而祈福

此見左昭十七年晉頃公事

天子許之朝禮使者事畢客出萇弘謂劉康公曰夫祈

福于三塗而受禮于天子此柔嘉之事也而客有武色

殆有他事願公備之也康公乃敝戎車卒士以待之晉

果使祭事先令楊子將卒十二萬而隨之涉于棘津蘄

聊阮梁蠻氏滅三國焉

呂覽  
精論

紀年 晉襄公六年洛絕于河

七年八月襄公卒太子夷臯少晉人以難故欲立長君  
趙盾曰立襄公弟雍好善而長先君愛之且近於秦秦  
故好也立善則固事長則順奉愛則孝結舊好則安賈  
季曰不如其弟樂辰羸嬖於二君立其子民必安之趙  
盾曰辰羸賤班在九人下其子何震之有且為二君嬖  
淫也為先君子不能求大而出在小國僻也毋淫子僻

無威陳小而遠無援將何可乎使士會於秦迎公子雍  
賈季亦使人召公子樂於陳趙盾廢賈季以其殺陽處  
父十月葬襄公十一月賈季奔翟是歲秦繆公亦卒

史晉

世家

### 靈公

靈公元年四月秦康公曰昔文公之入也無衛故有呂  
卻之患乃多與公子雍衛太子毋繆嬴日夜抱太子以  
號泣於朝曰先君何罪其嗣亦何罪舍適而外求君將

安置此出朝則抱以適趙盾所頓首曰先君奉此子而屬之子曰此子材吾受其賜不材吾怨子今君卒言猶在耳而棄之若何趙盾與諸大夫皆患繆嬴且畏誅乃背所迎而立太子夷臯是為靈公發兵以距秦送公子雍者趙盾為將往擊秦敗之令狐先蔑隨會亡奔秦秋齊宋衛鄭曹許君皆會趙盾盟於扈以靈公初立故也

史晉  
世家

晉襄公薨嗣君少趙宣子相謂大夫曰立少君懼多



難請立雍雍長出在秦秦大足以為援賈季曰不若  
公子樂樂有寵于國先君愛而仕之翟翟足以為援  
穆嬴抱太子以呼于庭曰先君奚罪其嗣亦奚罪舍  
嫡嗣不立而外求君乎出朝抱以見宣子曰惡難也  
故欲立長君長君立而少君壯難乃至矣宣子患之  
遂立太子也

說苑建本與  
左傳畧同

秦晉戰交綏

晉靈公  
六年

秦使人謂晉將軍曰三軍之士

皆未息明日請復戰史駢曰使者目動而言肆懼我

將遁矣迫之河必敗之趙盾曰死傷未收而棄之不  
惠也不待期而迫人于險無勇也請待秦人夜遁

說苑

至公

趙宣子言韓獻子于晉侯曰其為人不黨治衆不亂臨  
死不恐晉侯以為中軍尉河曲之役

晉靈公七年

趙宣子之

車千行韓獻子戮其僕人皆曰韓獻子必死矣其主朝  
升之而暮戮其僕誰能待之役罷趙宣子觴大夫爵三  
行曰二三子可以賀我二三子曰不知所賀宣子曰我

言韓厥于君言之而不當必受其刑今吾車失次而戮之僕可謂不黨矣是吾言當也二三子再拜稽首曰不惟晉國適享之乃唐叔是賴之敢不再拜稽首乎

說苑至公

四年伐秦取少梁秦亦取晉之穀

史晉世家

六年秦康公伐晉取羈馬晉侯怒使趙盾趙穿卻缺擊秦大戰河曲趙穿最有功七年晉六卿患隨會之在秦常為晉亂乃詐令魏壽餘反晉降秦秦使隨會之魏因

執會以歸晉

史晉世家

八年周頃王崩公卿爭權故不赴晉使趙盾以車八百乘平周亂而立匡王是年楚莊王初即位十二年齊人

弑其君懿公

史晉世家

宋人殺昭公

晉靈公十年

晉趙宣子請師於靈公而救之靈

公曰非晉國之急也宣子曰不然夫大者天地其次君臣所以為順也今殺其君所以反天地逆人道也天將加災焉晉為盟主而不救天罰懼及矣詩云凡民有喪匍匐救之而况國君乎於是靈公乃興師而從之宋人

聞之儼然感悅而晉國日昌

韓詩卷一

十四年靈公壯侈厚斂以雕牆從臺上彈人觀其避丸也宰夫胹熊蹯不熟靈公怒殺宰夫使婦人持其屍出棄之過朝趙盾隨會前數諫不聽已又見死人手二人前諫隨會先諫不聽靈公患之使鉏麇刺趙盾盾閨門開居處節鉏麇歎曰殺忠臣棄君命罪一也遂觸樹而

死

史晉世家

晉靈公造九層臺廢用千億謂左右曰敢有諫者斬孫

息乃諫曰臣能累十三搏基加九鷄子其上公曰吾少  
學未嘗見也子為寡人作之孫息即以碁子置其下加  
九鷄子其上左右惴懼靈公扶伏氣息不續公曰危哉  
孫息曰臣謂是不危也復有危此者公曰願見之孫息  
曰九層之臺三年不成男不得耕女不得織國用空虛  
戶口減少吏民叛亡鄰國謀議將興兵社稷將滅君何  
所望靈公曰寡人之過乃至于此即壞九層之臺

說苑

說苑

孫息學悲歌引琴作鄭衛之音靈公大惑故

作衛公之曲歌而和之

白帖引

琴清英 晉王謂孫息曰子鼓琴能令寡人悲乎息

曰今處高臺邃宇連屋重戶藿肉漿酒倡樂在前難

可使悲者乃謂少失父母長無兄嫂當道猶坐暮無

所止於此者乃可悲耳乃援琴而鼓之晉王傷心哀

涕曰何子來遲也

釋史云是孟嘗雍門之事也稱王更誤

趙宣孟將上之絳

地志今山西絳州有哺飢坂

見飢桑之下有餓人

卧不能起者宣孟止車為之下食蠲而舖之再咽而後

能視宣孟問之曰女何為而餓若是對曰臣宦於絳歸而絕糧羞行乞而憎自取故至於此宣孟與脯一朐拜受而弗敢食也問其故對曰臣有老母將以遺之宣孟曰斯食之吾更與汝乃復賜之脯二束與錢百而遂去之處二年晉靈公欲殺宣孟伏士於房中以待之因發酒於宣孟宣孟知之中飲而出靈公令房中之士疾追而殺之一人追疾先及宣孟之面曰嘻君轡

教宣孟使就車也

吾請為君反死宣孟曰而名為誰反走對曰何以名為



臣骖桑下之餓人也還鬪而死宣孟遂活

呂覽報更又說苑復恩

初肴常田首山見桑下有餓人餓人示眯明也肴與之食食其半問其故曰宦三年未知母之存不願遺母肴義之益與之飯肉已而為晉宰夫趙肴弗復知也九月

晉靈公十四年

晉靈公飲趙肴酒伏甲將攻肴公宰示眯明知

之恐肴醉不能起而進曰君賜臣觴三行可以罷欲以去趙肴令先母及難肴既去靈公伏士未會先縱齧狗名教明為肴搏殺狗肴曰棄人用狗雖猛何為然不知

明之為陰德也已而靈公伏士出逐趙盾亦昧明反擊  
伏士伏士不能進而竟脫盾盾問其故曰我桑下餓人  
問其名弗告明亦因亡去盾遂奔未出晉境乙丑盾昆  
弟趙穿襲殺靈公於桃園

虞翻曰  
國名也

而迎趙盾趙盾素貴

得民和靈公少侈民不附故為弑易盾復位晉太史董  
狐書曰趙盾弑其君以視于朝盾曰弑者趙穿我無罪  
太史曰子為正卿而亡不出境反不誅國亂非子而誰  
孔子聞之曰董狐古之良史也書法不隱

史晉世家與  
左氏稍異

西京雜記

廣川王發晉靈公冢得玉蟾蜍一枚大

如拳腹空容五合水光潤如新玉取以盛書滴

趙盾使趙穿迎襄公弟黑臀于周而立之是為成公成  
公者文公少子其母周女也壬申朝于武宮

成公

成公元年賜趙氏為公族伐鄭鄭倍晉故也

三年鄭伯初立附晉而棄楚楚怒伐鄭晉往救之

六年伐秦虜秦將赤

七年成公與楚莊王爭彊會諸侯于扈陳畏楚不會晉使中行桓子伐陳因救鄭與楚戰敗楚師是年成公卒

子景公據立

史晉世家

景公

景公元年春陳大夫夏徵舒弑其君靈公二年楚莊王伐陳誅徵舒三年楚莊王圍鄭鄭告急於晉晉使荀林父將中軍隨會將上軍趙朔將下軍卻克欒書先穀韓厥鞏朔佐之六月至河聞楚已服鄭鄭伯肉袒與盟而去

荀林父欲還先穀曰凡來救鄭不至不可將率離心卒  
渡河楚已服鄭欲飲馬于河為名而去楚與晉軍大戰  
鄭新附楚畏之反助楚攻晉晉軍敗走河爭渡船中人  
指甚衆楚虜我將智縈歸而林父曰臣為督將軍敗當  
誅請死景公欲許之隨會曰昔文公之與楚戰城濮成  
王歸殺子玉而文公乃喜今楚已敗我師又誅其將是  
助楚殺仇也乃止

史晉  
世家

初晉趙盾舉韓厥晉君以為中軍尉趙盾死子朔嗣為

卿至景公三年趙朔為晉將朔取成公姊為夫人大夫屠岸賈欲誅趙氏初趙盾在時夢見叔帶持要而哭甚悲已而笑拊手且歌盾卜之兆絕而後好趙史援占之曰此夢甚惡非君之身乃君之子然亦君之咎至孫趙將世益衰屠岸賈者始有寵于靈公及至于景公而賈為司寇將作難乃治靈公之賊以致趙盾徧告諸將曰盾雖不知猶為賊首以臣弑君子孫在朝何以懲罪請誅之韓厥曰靈公遇賊趙盾在外吾先君以為無罪故

不誅今諸君將誅其後是非先君之意而妄誅謂之亂  
臣有大事而君不聞是無君也屠岸賈不聽韓厥告趙  
朔趣亡朔不肯曰子必不絕趙祀朔死不恨韓厥許諾  
稱疾不出賈不請而擅與諸將攻趙氏于下宮殺趙朔  
趙同趙括趙嬰齊皆滅其族趙朔妻成公姊有遺腹走  
公宮匿趙朔客曰公孫杵臼謂朔友人程嬰曰胡不死  
程嬰曰朔之婦有遺腹若幸而男吾奉之即女也吾徐  
死耳居無何而朔婦免身生男屠岸賈聞之索于宮中

夫人置兒絝中祝曰趙宗滅乎若號即不滅若無聲及索兒竟無聲已脫程嬰謂公孫杵臼曰今一索不得後必且復索之奈何公孫杵臼曰立孤與死孰難程嬰曰死易立孤難耳公孫杵臼曰趙氏先君遇子厚子強為其難者吾為其易者請先死乃二人謀取他人嬰兒負之衣以文葆匿山中程嬰出謬謂諸將軍曰嬰不肖不能立趙孤誰能與我千金吾告趙氏孤處諸將皆喜許之發師隨程嬰攻公孫杵臼杵臼謬曰小人哉程嬰昔



下宮之難不能死與我謀匿趙氏孤兒今又賣我縱不能立而忍賣之乎抱兒呼曰天乎天乎趙氏孤兒何罪請活之獨殺杵臼可也諸將不許遂殺杵臼與孤兒諸將以為趙氏孤兒良已死皆喜然趙氏真孤乃反在程嬰卒與俱匿山中十五年

史趙世家又新序卷七及說苑復恩皆同但無程嬰杵

白事

四年先穀以首計而敗晉軍河上恐誅乃奔翟與翟謀伐晉晉覺乃族穀穀先軫子也五年伐鄭為助楚故也

是時楚莊王彊以挫晉兵河上也

六年楚伐宋宋來告急晉晉欲救之伯宗諫曰楚天方  
開之不可當乃使解揚紿為救宋鄭人執與楚楚厚賜  
使反其言令宋急下解揚紿許之卒致晉君言楚欲殺  
之或諫乃歸解揚

史晉  
世家

楚莊王伐宋宋告急于晉

晉景公  
六年

晉景公欲發兵救

宋伯宗諫曰天方開楚未可伐也乃求壯士得霍人  
解揚字子虎誑楚令宋毋降過鄭鄭與楚親乃執解

楊而獻楚楚王厚賜與約使反其言令宋趣降三要  
乃許於是楚登解揚樓車令呼宋遂負楚約而致其  
君命曰晉方悉國兵以救宋宋雖急慎毋降楚晉兵  
今至矣楚莊王大怒將殺之解揚曰君能制命為義  
臣能承命為信受吾君命以出有死無隕莊王曰若  
之許我已而背之其信安在解揚曰所以許王欲以  
成吾君命也將死顧謂楚軍曰為人臣無忘盡忠得  
死者楚王諸弟皆諫王赦之於是赦解揚使歸晉爵

之為上卿

史鄭世家  
一載楚

晉國苦盜有郄雍者能視盜之貌察其眉睫之間而得其情晉侯使視盜千百無遺一焉晉侯喜告趙文子曰吾得一人而一國盜為盡矣奚用多為文子曰吾君恃伺察而得盜盜不盡矣且郄雍必不得其死焉俄而羣盜謀曰吾所窮者郄雍也遂共盜而殘之晉侯聞而大駭立召文子而告之曰果如子言郄雍死矣然取盜何方文子曰周諺有言察見淵魚者不祥智料隱匿者有

殃且君欲無盜莫若舉賢而任之使教明于上化行于下民有耻心則何盜之為于是用隨會知政而羣盜奔

秦焉

列子說符 隨會執政當晉景公七年

范文子喜直言武子擊之以杖曰直議者不為人所容

非徒危身又將危父

韓子外儲左

七年晉使隨會滅赤狄八年使卻克於齊齊頃公毋從樓上觀而笑之所以然者卻克僂而魯使蹇衛使眇故齊亦令人如之以道客卻克怒歸至河上曰不報齊者

河伯視之至國請君欲伐齊景公問知其故曰子之怨

安足以煩國弗聽魏文子請老休辟卻克克執政

史晉世家

左傳無魏文子請

老者隨武子也

九年楚莊王卒晉伐齊齊使太子彊為質於晉晉兵罷

史晉

世家

十一年春齊伐魯取隆魯告急衛衛與魯皆因卻克告

急於晉晉乃使卻克欒書韓厥以兵車八百乘與魯衛

共伐齊夏與頃公戰於鞏傷困頃公頃公乃與其右易

位下取飲以得脫去齊師敗走晉追北至齊頃公獻寶器以求平不聽卻克曰必得蕭桐姪子為質齊使曰蕭桐姪子頃公母頃公母猶晉君母奈何必得之不義請復戰晉乃許與平而去

史晉世家

紀年 晉景公十一年齊國佐來獻玉磬紀公之甌

韓非子

靡笄之役

景公十一年

韓獻子將斬人郄獻子

聞之駕往救之比至則已斬之矣郄子因曰胡不以殉其僕曰曩不將救之乎郄子曰吾敢不分謗乎或

曰郄子言不可不察也非分謗也韓子之所斬也若  
罪人則不可救救罪人法之所以敗也法敗則國亂  
若非罪人而勸之以殉勸之以殉是重不辜也重不  
辜民所以起怨者也民怨則國危郄子之言非危則  
亂不可不察也且韓子之所斬若罪人郄子何分焉  
斬若非罪人則已斬之矣而郄子乃至是韓子之謗  
已成而郄且後至也夫郄子曰以殉不足以分斬人  
之謗而又生殉之謗是何言分謗也昔者紂為炮烙



崇侯惡來又曰斬涉者之脛也奚分於紂之謗且民之望於上也甚矣韓子弗得且望郅子之得之也今郅子俱弗得則民絕望於上矣故曰郅子之言非分謗也益謗也且郅子之往救罪也以韓子為非也不道其所以為非而勸之以殉是使韓子不知其過也夫下使民望絕於上又使韓子不知其失吾未得郅子之所以分謗者也

楚申公巫臣盜夏姬以奔晉晉以巫臣為邢大夫

史晉世家

十二年冬齊頃公如晉欲上尊晉景公為王景公讓不敢晉始作六卿韓厥輦朔趙穿荀騅趙括趙旃皆為卿智瑩自楚歸十三年魯成公朝晉晉弗敬魯怒去倍晉

晉伐鄭取汜

史晉世家

十四年梁山崩問伯宗伯宗以為不足怪也

史晉世家

梁山崩

晉景公十四年

晉君召大夫伯宗道逢輦者以其輦服

於道伯宗使其右下欲鞭之輦者曰君趨道豈不遠矣不知事而行可乎伯宗喜問其居曰絳人也伯宗曰子

亦有聞乎曰梁山崩壅河顧三日不流是以召子伯宗  
曰如之何曰天有山天崩之天有河天壅之伯宗將如  
之何伯宗私問之曰君其率羣臣素服而哭之旣而祠  
焉河斯流矣伯宗問其姓名弗告伯宗至君問伯宗以  
其言對於是君素服率羣臣而哭之旣而祠焉河乃流  
君問伯宗何以知之伯宗不言受輦者詐以自知  
孔子聞之曰伯宗其無後攘人之善  
韓詩卷八  
十六年楚將子反怨巫臣滅其族巫臣怒遺子反書曰

必令子罷於奔命乃請使吳令其子為吳行人教吳乘車用兵吳晉始通約伐楚

史晉世家

十七年誅趙同趙括族滅之韓厥曰趙衰趙盾之功豈可忘乎奈何絕祀乃復令趙庶子武為趙後復與之邑

史晉世家

晉景公疾卜大業之後不遂者為祟景公問韓厥厥知趙孤在乃曰大業之後在晉絕祠者其趙氏乎夫自中衍者皆嬴姓也中衍人面鳥喙降佐殷帝太戊及周天

子皆有明德下及幽厲無道而叔帶去周適晉事先君  
文侯至于成公世有立功未嘗絕祠今吾君獨滅趙宗  
國人哀之故見龜策惟君圖之景公問趙尚有後乎韓  
厥具以實告于是景公乃以韓厥謀立趙孤兒召而匿  
之宮中諸將入問疾景公因韓厥之衆以脅諸將而見  
趙孤名曰武諸將不得已乃曰昔下宮之難屠岸賈為  
之矯以君命并命羣臣非然孰敢作難微君之疾羣臣  
固且請立趙後今君有命羣臣之願也于是召趙武程

嬰徧拜諸將遂反與程嬰趙武攻屠岸賈滅其族復與

趙武田邑如故

景公十七年

及趙武冠為成人程嬰乃辭諸

大夫謂趙武曰昔下宮之難我非不能死我思立趙氏

之後今趙武既立為成人復故位我將下報趙宣孟與

公孫杵臼趙武啼泣頓首固請曰武願苦筋骨以報子

至死而子忍去我死乎程嬰曰不可彼以我為能成事

故先我死今我不報是以我事為不成遂自殺趙武服

齊衰三年為之祭邑春秋祠之世世勿絕

史趙世家  
又新序卷七

及說苑  
復恩

繹史 按左傳趙氏之難起自莊姬無屠岸賈其人者事在魯成公八年即晉景公之十七年於是年已有趙武無遺腹匿孤之說也史遷好奇每存異說而事與年推尋皆無據

十九年夏景公病立太子壽曼為君是為厲公後月餘景公卒

厲公

厲公元年初立欲和諸侯與秦桓公夾河而盟歸而秦

倍盟與翟謀伐晉三年使呂相讓秦

詳左傳

因與諸侯伐

秦至涇敗秦于麻隧虜其將成差

五年三卻讒伯宗殺之伯宗以好直諫得禍國人以是

不附厲公

以上史晉世家約左傳文

六年春鄭倍晉與楚盟晉怒檄書曰不可以當吾世而失諸侯乃發兵厲公自將五月渡河聞楚兵來救范文子請公欲還卻至曰發兵誅逆見疆辟之無以令諸侯



遂與戰癸巳射中楚共王目楚兵敗于鄢陵子反收餘  
兵拊循欲復戰晉患之共王召子反其侍者豎陽穀進  
酒子反醉不能見王怒讓子反子反死王遂引兵歸晉  
由此威諸侯欲以令天下求霸

史晉  
世家

中行獻子將伐鄭范文子曰不可得志于鄭諸侯仇我  
憂必滋長卻至又曰得鄭是兼國也兼國則王王者固  
多憂乎文子曰王者盛其德而遠人歸故無憂今我寡  
德而有王者之功故多憂今子見無土而欲富者樂乎

哉

說苑  
貴德

晉之三卿郄錡郄犇郄至從晉厲公會諸侯于柯陵周襄公在會晉厲公視遠步高郄錡見單子其語犯郄犇見其語訐郄至見其語伐齊國佐見其語盡單襄公告魯成公曰晉將有亂其君與三郄其當之乎魯侯成公曰寡人固晉而彊其君今君曰將有亂敢問天道乎抑人故也對曰吾非瞽史也焉知天道吾見晉君之容而聽三郄之語豈殆必有禍矣君子目以正體足以從

之是以觀容而知其心今晉侯視遠而足高目不在體而足不步目其心必異矣目體不相從何以能久夫合諸侯國之大事也于是觀存亡之徵焉故國將有福其君步言視聽必皆得適順善則可以知德矣視遠日絕其義足高日棄其德言爽日反其信聽淫日離其名目以處義足以踐德口以庇信耳以聽名者矣故不可不慎也偏亡者有咎旣亡則國從之今晉侯無一可焉吾是以云夫郤氏晉之寵人也是族在晉有三卿五大夫

貴矣亦可以戒懼矣今却伯之語犯却叔許却季伐犯則陵人許則誣人伐則擄人有是寵也而益之以三怨其誰能忍之齊國武子亦將有禍齊亂國也立於滌亂之朝而好盡言以暴人過怨之本也惟善人能受盡言今齊既亂其能善乎居二年晉殺三卿

晉厲公七年

明年厲

公弒于東門是歲也齊人果殺國武子

新書卷十與國語畧同

厲公多外嬖姬歸欲盡去羣大夫而立諸姬兄弟寵姬兄曰胥童嘗與卻至有怨及樂書又怨卻至不用其計

而遂敗楚乃使人閒謝楚楚來詐厲公曰鄢陵之戰實  
至召楚欲作亂內子周立之會與國不俱是以事不成  
厲公告欒書欒書曰其殆有矣願公試使人之周微考  
之果使卻至於周欒書又使公子周見卻至卻至不知  
見賣也厲公驗之信然遂怨卻至史記晉世家傳言外嬖  
謂嬖臣非嬖姬也且妾之稱姬非當時語史記之誤多  
有如此者

八年厲公獵與姬飲卻至殺豕奉進宦者奪之卻至射

殺宦者公怒曰季子欺予將誅三卻未發也卻錡欲攻公曰我雖死公亦病矣卻至曰信不反君智不害民勇不作亂失此三者誰與我我死耳十二月壬午公令胥童以兵八百人襲攻殺三卻胥童因以劫欒書中行偃于朝曰不殺二子患必及公公曰一旦殺三卿寡人不忍益也對曰人將忍君公弗聽謝欒書等以誅卻氏罪大夫復位二子頓首曰幸甚幸甚公使胥童為卿閏月乙卯厲公游匠驪氏欒書中行偃以其黨襲捕厲公囚

之殺胥童而使人迎公子周于周而立之是為悼公

史晉

世  
家

晉厲公之時六卿貴胥童長魚矯諫曰大臣貴重敵主  
爭事外市樹黨下亂國法上以劫主而國不危者未嘗  
有也公曰善乃誅三卿胥童長魚矯又諫曰夫同罪之  
人偏誅而不盡是懷怨而借之間也公曰吾一朝而夷  
三卿予不忍盡也長魚矯對曰公不忍之彼將忍公公  
不聽居三月諸卿作難遂殺厲公而分其地

厲公八年  
韓子內儲

史記 晉厲公殺其大夫三卻欒書畏及乃遂弑其  
君厲公更立襄公曾孫周是為悼公晉由此大夫稍  
彊

韓武子田獸已聚矣田車合矣傳來告曰晉公

厲公也

堯武子謂欒懷子曰子亦知君好田獵也獸亦聚矣  
田車合矣吾可以卒獵而後弔乎懷子對曰范氏之  
亡也多輔而少拂今臣於君輔也畣於君拂也君胡



不問於畠也武子曰盈而欲拂我乎而拂我矣何必

畠哉遂輟田

說苑按樂盈之死  
前此百三十年矣

### 悼公

悼公元年正月庚申樂書中行偃弑厲公葬之以一乘

車厲公囚六日死死十日庚午智瑩迎公子周來至絳

刑雞與大夫盟而立之是為悼公

史晉世家

正月辛巳朝武宮二月乙酉即位悼公周者其大父捷

晉襄公少子也不得立號為桓叔桓叔最愛桓叔生惠

伯談談生悼公周周之立年十四矣悼公曰大父父皆  
不得立而避難于周客死焉寡人自以踈遠毋幾為君  
今大夫不忘文襄之業而惠立桓叔之後賴宗廟大夫  
之靈得奉晉祀豈敢不戰戰乎大夫其亦佐寡人于是  
遂不臣者七人修舊功施德惠收文公入時功臣後

史晉

世家 與

左氏小異

秋伐鄭鄭師敗遂至陳三年晉會諸侯悼公問羣臣可  
用者祁傒舉解狐解狐傒之仇復問舉其子祁午君子

曰祁僂可謂不黨矣外舉不隱仇內舉不隱子

史晉世家

晉平公

平公當作悼公

問於祁黃羊曰南陽無令其誰可而為

之祁黃羊對曰解狐可平公曰解狐非子之仇耶對曰  
君問可非問臣之仇也平公曰善遂用之國人稱善焉  
居有間平公又問祁黃羊曰國無尉其誰可而為之對  
曰午可平公曰午非子之子耶對曰君問可非問臣之  
子也平公曰善又遂用之國人稱善焉孔子聞之曰善  
哉祁黃羊之論也外舉不避仇內舉不避子可謂公矣

呂覽去私 左襄三

年悼公問祁奚畧同

說苑 趙宣子言韓獻子於晉侯曰其為人不黨治  
衆不亂臨死不恐晉侯以為中軍尉河曲之後趙宣  
子之車干行韓獻子戮其僕人皆曰韓獻子必死矣  
其主朝昇之而暮戮其僕誰能待之役罷趙宣子觴  
大夫爵三行曰二三子可以賀我二三子曰不知所  
賀宣子曰我言韓厥於君言之而不當必受其刑今  
吾軍失次而戮之僕可謂不黨矣是吾言當也二三

子再拜稽首曰不惟晉國適享之乃唐叔是賴之敢

不再拜稽首乎

此事在悼公四年

方會諸侯悼公弟楊干亂行魏絳戮其僕悼公怒或諫  
公公卒賢絳任之政使和戎戎大親附十一年悼公曰  
自吾用魏絳九合諸侯和戎翟魏子之力也賜之樂三  
讓乃受之冬秦取我櫟

史晉世家

十四年晉使六卿率諸侯伐秦度涇大敗秦軍至櫟林  
而去十五年悼公問治國於師曠師曠曰惟仁義為本

冬悼公卒子平公彪立

史晉世家

### 平公

平公元年伐齊齊靈公與戰靡下齊師敗走晏嬰曰君亦毋勇何不止戰遂去晉追遂圍臨菑盡燒屠其郭中東至膠南至沂齊皆城守晉乃引兵歸六年魯襄公朝

晉

史晉世家

叔向之弟羊舌虎善欒盈欒盈有罪於晉晉誅羊舌虎叔向為之奴而股

沒入為奴股繫也

祁奚曰吾聞小人得位不

爭不祥君子在憂不救不祥乃往見范宣子而說也曰  
聞善為國者賞不過而刑不慢賞過則懼及淫人刑慢  
則懼及君子與其不幸而過寧過而賞淫人毋過而刑  
君子故堯之刑也殛鯀於虞而用禹周之刑也戮管蔡  
而相周公不慢刑也宣子乃命吏出叔向

呂覽開春  
又說苑善說

樂盈作  
樂達

羊舌子之妻叔向叔魚之母也羊舌子好直不容于晉  
去而之三室之邑邑人攘羊而遺之羊舌子不受姬曰

不如受而埋之羊舌子曰何不餉肸與鮒也

叔向名肸  
叔魚名鮒

姬曰不可南方有鳥曰吉乾食其子不擇肉子多不義  
今肸與鮒童子也隨大人而化不可食以不義之肉乃  
盛以甕埋壚陰後攘羊事敗吏至發而視之舌尚存吏  
曰君子哉羊舌子也國人異之遂以羊舌為族

列女  
傳

叔向欲娶於申公巫臣氏夏姬之女叔姬不欲平公強  
使娶之生楊食我號曰伯碩生時侍者謁之叔姬往視  
之及堂聞其號也而還曰豺狼之聲也狼子野心滅羊



舌者必是子也及長與祁勝為亂晉人殺食我羊舌氏  
由是遂滅

晉遂欒盈之族

晉平公六年

命其家臣有敢從者死其臣曰

辛俞從之吏得而將殺之君曰命汝無得從敢從何也  
辛俞對曰臣聞三世仕於家者君之二世者主之事君  
以死事主以勤為其賜之多也今臣三世于欒氏受其  
賜多矣臣敢畏死而忘三世之恩哉晉君釋之

說苑復  
恩與

國語  
畧同

晉平公七年欒逞有罪奔齊明年齊莊公微遣欒逞于曲沃以兵隨之齊兵上太行欒逞從曲沃中反襲入絳絳不戒平公欲自殺范獻子止公以其徒擊逞逞敗走曲沃曲沃攻逞逞死遂滅欒氏宗逞者欒書孫也

左氏  
逞作

盛其入絳與魏氏謀齊莊公聞逞敗乃還取晉之朝歌去以報臨淄之役也

史晉  
世家

尸子 范獻子游河大夫皆在君曰知欒氏之子乎大夫莫荅舟人清涓捨楫對曰君奚問欒氏之子君

曰自吾亡欒氏也其老者未死少者壯矣清涓曰善  
修晉國之政內得大夫外不失百姓雖欒氏子其若  
君何若不修晉國之政內不得大夫而外失百姓則  
舟中之人皆欒氏子也君曰善

十年齊崔杼弑莊公晉因齊亂伐敗齊于高唐報大行  
之役也

史晉世家

晉平公閒居師曠侍坐平公曰子生無目

朕甚矣子之墨墨也師曠對曰天下有五墨墨而臣不  
得與一焉平公曰何謂也師曠曰羣臣行賂以采名譽

百姓侵田冤無所告訴而君不悟此一墨墨也忠臣不用用臣不忠下才處高不肖臨賢而君不悟此二墨墨也姦臣欺詐空虛府庫以其少才覆塞其惡賢人逐姦邪貴而君不悟此三墨墨也國貧民罷上下不和而好財用兵嗜慾無厭諂諛之人容容在旁而君不悟此四墨墨也至道不明法令不行吏民不正百姓不安而君不悟此五墨墨也國有五墨墨而不危者未之有也臣之墨墨者小耳何害乎國家哉

新序  
卷一

師曠者或出于晉靈之世以主樂官妙辨音律撰兵書萬篇時人莫知其原裔出沒難詳也晉平公之時以陰陽之學顯于當世燠目為瞽人以絕塞衆慮專心于星算音律之中考鐘呂以定四時無毫釐之異春秋不記師曠出何帝之時曠知命欲終乃述寶符百卷晉戰國時其書滅絕矣

拾遺記 漢書兵家  
師曠八篇周靈王

淮南子 昔者師曠奏白雪之音而神物為之下降風雨暴至平公瘡病晉國赤地 又淮南子 師曠瞽

而為太宰晉無亂政有貴于見者也

宋符瑞志 白燕者師曠時銜丹書來至 河精人

頭魚身師曠時所受識也 玉羊師曠時來至

晉平公出言而不當師曠舉琴而撞之趺衽宮壁左右

欲塗之平公曰舍之以此為寡人失

淮南子  
齊俗

晉平公與羣臣飲飲酣乃喟然嘆曰莫樂為人君惟其  
言而莫之違師曠侍坐於前援琴撞之公披衽而避琴  
壞於壁公曰太師誰撞師曠曰今者有小人言於側者

故撞之公曰寡人也師曠曰啞

歎息之聲

是非君人者之言

也左右請除之公曰釋之以為寡人戒

韓子難一

晉平公鑄大鐘使工聽之皆以為調矣師曠曰不調請

更鑄之平公曰工皆為調矣師曠曰後世有知音者將

知鐘之不調也臣竊為君耻之至於師涓而果知鐘之

不調也

呂覽長見淮南子修務又

古文瑣語

師曠御晉平公鼓瑟輟而笑曰齊侯與

其嬖戲墜于牀而傷其臂平公命人書之曰某月某

日齊侯戲而傷問之於齊侯笑而然有之

古文瑣語

晉平公至澮上見人乘白驂八駟以來

有狸身而狐尾去其車而隨公之車公問師曠師曠  
曰狸身而狐尾其名曰首陽之神飲酒於霍太山而  
歸其逢君於澮乎君具有喜有鳥飛從南方來質  
白五色皆備集平公之庭相見如讓公召叔嚮問之  
叔嚮曰吾聞師曠曰西方有白質鳥五色皆備其名  
曰翬南方赤質五色皆備其名曰搖來為吾君臣其祥



先至矣

白帖 晉平公時有鳥從南方來赤質五色皆備集于庭相讓叔向曰吾聞師曠曰西方有鳥白質五色曰翬南方有鳥赤質五色曰雉今來為君瑞也

晉平公問於師曠曰人君之道如何對曰人君之道清淨無為務在博愛趨在任賢廣開耳目以察萬方不固溺於流俗不拘繫於左右廓然遠見踔然獨立屢省考績以臨臣下此人君之操也平公曰善

說苑君道

說苑

敬慎

韓平子問於叔向曰剛與柔孰堅對曰臣年

八十矣齒再墮而舌尚存老聃有言曰天下之至柔馳騁乎天下之至堅又曰人之生也柔弱其死也剛強萬物草木之生也柔脆其死也枯槁因此觀之柔弱者生之徒也剛強者死之徒也夫生者毀而必復死者破而愈亡吾是以知柔之堅於剛也平子曰善哉然則子之行何從叔向曰臣亦柔耳何以剛為平子曰柔無乃脆乎叔向曰柔者紐而不折廉而不缺

何為脆也天之道微者勝是以兩軍相加而柔者克之兩仇爭利而弱者得焉易曰天道虧滿而益謙地道變滿而流謙鬼神害滿而福謙人道惡滿而好謙夫懷謙不足之柔弱而四道者助之則安往而不得其志乎平子曰善

韓非子 叔向賦獵功多者受多功少者受少

晉平公問於叔向曰國家之患孰為大對曰大臣重祿而不極諫近臣畏罰而不敢言下情不上通此患之大

者也公曰善於是令國曰欲進善言謁者不通罪當死

新序

卷二

晉平公問叔向曰歲饑民疫翟人攻我我將若何對曰  
歲饑來年而反矣疾疫將止矣翟人不足患也公曰患  
有大于此者乎對曰夫大臣重祿而不極諫近臣畏罪  
而不敢言左右顧寵于小官而君不知此誠患之大者  
也公曰善于是令國中曰欲有諫者為隱左右言及國

吏罪

說苑  
善說

晉平公問于叔向曰昔者齊桓公九合諸侯一匡天下

不識其君之力乎其臣之力也叔向對曰管仲善制

賓胥無善削縫

言損益  
若女工

隰朋善純緣

言增飾  
若女工

衣成君舉

而服之亦其臣之力也君何力之有師曠伏琴而笑之

公曰太師奚笑也師曠對曰臣笑叔向之對君也凡為

人臣者猶炮宰和五味而進之君君弗食孰敢強之也

臣請譬之君者壤地也臣者草木也必壤地美然後草

木碩大亦君之力也臣何力之有

韓子難二  
新序卷四

又

師曠曰臣請譬之以五味管仲善割斷之隰朋善煎熬之賓須無善齊和之羹已熟矣奉而進之而君不食誰能強之亦君之力也

新序

叔向御平公請事公腓痛足痺轉筋而不敢壞坐晉國聞之皆曰叔向賢者平公禮之轉筋而不敢壞坐晉國之辭仕托慕叔向者國之鍾矣

韓子外儲左

高士傳 亥唐晉人也高恪寡素晉人憚之雖蔬食菜羹平公每為之欣飽公與亥唐坐有閒亥唐出叔

向入平公伸一足曰吾向時與亥子坐腓痛足痺不敢伸叔向勃然作色不說公曰子欲貴乎吾爵子欲富乎吾祿子夫亥先生乃無欲也吾非正坐無以養之子何不說乎

董叔娶于范氏曰將以求繫援也他日董祁愬于范獻子獻子執而縛之于庭槐叔向曰求繫既繫矣求援既援矣爾欲得之無所謂也

白帖  
婚姻

楚王弟在秦秦不出也中射之士曰資臣百金臣能出

之因載百金之晉見叔向曰楚王弟在秦秦不出也請以百金委叔向受金而以見之晉平公曰可以城壺丘矣平公曰何也對曰楚王弟在秦秦不出也是秦惡楚也必不敢禁我城壺丘若禁之我曰為我出楚王之弟吾不城也彼如出之可以德楚彼不出是卒惡也必不敢禁我城壺丘矣公曰善乃城壺丘謂秦公曰為我出楚王之弟吾不城也秦因出之楚王大說以鍊金百鎰

遺晉

韓子說林



楚公子午使于秦秦囚之其弟獻三百金於叔向叔向謂平公曰何不城壺丘秦楚患壺丘之城若秦恐而歸公子午以止吾城也君乃止難亦未構楚必德君平公曰善乃城之秦恐遂歸公子午使之晉晉人

輟城楚獻晉賦三百車

說苑  
權謀

晉平公春築臺叔向曰不可古者聖王貴德而務施緩刑辟而趨民時今春築臺是奪民時也夫德不施則民不歸刑不緩則百姓愁使不歸之民役愁怨之百姓而

又奪其時是重竭也夫牧百姓養育之而重竭之豈所以定命安存而稱為人君于後世哉平公曰善乃罷臺

役

說苑  
貴德

晉平公使叔向聘于吳吳人拭舟以逆之左五百人右五百人有繡衣而豹裘者有錦衣而狐裘者叔向歸以告平公平公曰吳其亡乎奚以敬舟奚以敬民叔向對曰君為馳底之臺上可以發千兵下可以陳鐘鼓諸侯聞君者亦曰奚以敬臺奚以敬民所敬各異也於是平

公乃罷臺

說苑  
正諫

延陵季子游于晉

左襄公二十九年  
當晉平公十四年

入其境曰嘻暴哉

國乎入其都曰嘻力屈哉國乎立其朝曰嘻亂哉國乎  
從者曰夫子之入晉境未久也何其名之不疑也延陵  
季子曰然吾入其境田畝荒穢而不休雜增崇高吾是  
以知其國之暴也吾入其都新室惡而故室美新牆卑  
而故牆高吾是以知其民力之屈也吾立其朝君能視  
而不下問其臣善伐而不上諫吾是以知其國之亂也

說苑  
正理

十四年吳延陵季子來使與趙文子韓宣子魏獻子語  
曰晉國之政卒歸此三家矣十九年齊使晏嬰如晉與  
叔嚮語叔嚮曰晉季世也公厚賦為臺池而不恤政政  
在私門其可久乎晏子然之

史晉  
世家

趙文子問於叔向曰晉六卿孰先亡乎對曰其中行氏  
乎文子曰何故先亡對曰中行氏之為政也以苛為察  
以欺為明以刻為忠以計多為善以聚斂為良譬之萁

革大則大矣裂之道也當先亡

新序卷一  
南子道應

淮

世本 范氏晉大夫隰叔生世為焉生成伯缺伯缺  
生武子會會生文叔燮燮生宣叔勾勾生獻子鞅鞅  
生吉射 晉大夫逝遨生桓伯林父林父生宣伯庚  
庚生獻伯偃偃生穆伯吳吳生寅本姓荀自荀偃將  
中軍晉改中軍曰中行因氏焉元與智氏同祖逝遨  
按左傳僖公二十八年晉侯作三行以禦狄荀林  
父將中行此命氏之由中行行非中軍所改也世本說

非是杜氏云三行無佐疑大夫師

葉公諸梁問樂王鮒曰晉大夫趙文子為人何若對曰  
好學而受諫葉公曰疑未盡之對曰好學智也受諫仁  
也江出汶山其源若甕口至楚國其廣十里無他其下  
流多也人而好學受諫宜哉其立也詩曰其惟哲人告  
之話言順德之行此之謂也

新序卷四 家語孔  
子謂子路有此語

中年無令晉平公問趙武曰中年三國之股肱

趙齊  
燕也邯

鄆之肩髀也寡人欲得良令誰使而可武曰邢伯子可

邢伯一作邢子

公曰非子之讐耶曰私讐不入公門公又問曰

中府之令室誰使而可曰臣子可趙武所薦四十六人

外舉不避讐內舉不避子及武卒四十六人各就賓位

其無私德若此

韓子外儲左與左氏祁奚事同

晉獻文子

趙武也

成室晉大夫發焉

發禮往賀

張老曰美哉輪

焉美哉奐焉歌於斯哭於斯聚國族於斯文子曰武也

得歌於斯哭於斯聚國族於斯是全要領以從先大夫

于九京也北面再拜稽首君子謂之善頌善禱

檀弓下

趙文子與叔譽

即叔向

觀乎九京

地志今平陽府絳州有九原山山產莞花又云

遼州和順縣有九京山即文子與叔向觀處

文子曰死者如可作也吾誰與

歸叔譽曰其陽處父乎文子曰行并植于晉國不沒其身其知不足稱也其舅犯乎文子曰見利不顧其君其仁不足稱也我則隨武子乎利其君不忘其身謀其身不遺其友晉人謂文子知人文子其中退然如不勝衣其言呐呐然如不出諸其口所舉于晉國筦庫之士七十有餘家生不交利死不屬其子焉

檀弓下見國語

畧



韓宣子曰吾馬菽粟多矣甚臞何也周市對曰使騶盡粟以食雖無肥不可得也名為多與之其實少雖無臞亦不可得也主不審其情實坐而患之馬猶不肥也

韓子

外儲  
左

晉平公浮西河中流而嘆曰嗟乎安得賢士與共此樂者舟人固桑進對曰君言過矣夫劍產於越珠產江漢玉產昆山此三寶者皆無足而至今君苟好士則賢士至矣平公曰固桑來吾門下客食三千餘人朝食不足

暮收市租暮食不足朝收市租吾尚可謂不好士乎固  
桑對曰今夫鴻鵠高飛冲天然其所恃者六翮耳夫腹  
下之毳背上之毛增去一把飛不為高下不知君之食  
客六翮耶將腹背之毳也平公嘿然而不應

新序卷一  
又說苑簡

子事  
畧同

韓詩 晉平公游於河而樂曰安得賢士與之樂此  
也船人盍胥跪而對曰主君亦不好士耳夫珠出於  
江海玉出於崑山無足而至者猶主君之好也士有

足而不至者蓋主君無好士之意耳無患乎無士也  
平公曰吾食客門左千人門右千人朝食不足夕收  
市賦暮食不足朝收市賦吾可謂不好士乎盍胥對  
曰夫鴻鵠一舉千里所恃者六翮耳背上之毛腹下  
之毳益一把飛不為加高損一把飛不為加下今君  
之食客門左門右各千人亦有六翮在其中矣將皆  
背上之毛腹下之毳耶詩曰謀夫孔多是用不集

晉平公過九原而嘆曰嗟乎此地之蘊吾良臣多矣若

使死者起也吾將誰與歸乎叔向曰其趙武乎平公曰  
子黨於子之師也對曰臣敢言趙武之為人也立若不  
勝衣言若不出於口然其身舉士於白屋下者四十六  
人皆得其意而公家甚賴之及文子之死也四十六人  
皆就賓位是以無私德也臣故以為賢平公曰善

新序  
卷四

平公問叔向曰羣臣孰賢曰趙武子曰子黨於師人

向武之  
屬大夫

向曰武立如不勝衣言若不出口然所舉士

數十人皆得其意而公家甚賴之及武子之生也不

利其家死不託於孤臣敢以為賢也

韓外  
儲左

晉平公時藏寶之臺焚士大夫聞者趨車馳馬救火三

日三夜乃勝之公子晏子

一本作公子  
晏無子字

獨束帛而賀曰

甚善矣平公勃然作色曰珠玉之所藏也國之重寶也  
而天火之士大夫皆救之子獨賀何也公子晏子曰臣  
聞之王者藏於天下諸侯藏於百姓商賈藏於篋匱今  
百姓之於外短褐不蔽形糟糠不充口虛耗而賦歛無  
已王收大半而藏之臺是以天火之且臣聞之昔者桀

殘賊海內賦歛無度萬民甚苦是故湯誅之為天下戮  
笑今皇天降災於藏臺是君之福也而不自知變悟亦  
恐君之為鄰國笑矣公曰善自今以往請藏於百姓之

間

韓詩卷十 說  
苑 魏文侯事同

晉平公使弓冶治弓三年而弓始成平公射之不穿一

札將殺之弓人之妻蔡女也

一作繁  
人之女

見平公曰妾之夫

治此弓為亦勞矣其幹生於太山之阿一日三覲陰三  
覲陽傳以燕牛之角纏以荆廩之舛糊以阿魚之膠此

四者天下之妙選也而不能穿一札是君不能射也而反欲殺妾夫乎妾聞射之道左手如拒右手如附枝右手發之左手不知此蓋射之道也平公使弓人如蔡女言射之連穿七札其夫遂免賜金三鎰

列女傳 一作秦穆公事 又

作齊景公事

晉平公為馳逐之車龍旌衆色挂之以犀象錯之以羽芝車成題金千鎰立之於殿下令羣臣得觀焉田差三過而不一顧平公作色大怒問田差爾三過而不一顧

何為也田差對曰臣聞說天子者以天下說諸侯者以國說大夫者以官說士者以事說農夫者以食說婦姑者以織祭以奢亡紂以淫敗是以不敢顧也平公曰善乃命左右曰去車

說苑  
反質

晉平公好樂多其賦斂下治城郭曰敢有諫者死國人憂之有咎犯者見門大夫曰臣聞主君好樂故以樂見門大夫入言曰咎犯也欲以樂見平公曰內之止坐殿上則出鐘磬竽瑟坐有頃平公曰客子為樂咎犯對曰



臣不能為樂臣善隱平公召隱士十二人咎犯曰隱臣  
竊顧昧死御平公曰諾咎犯申其左臂而詘五指平公  
問於隱官曰占之為何隱官皆曰不知平公曰歸之咎  
犯則申其一指曰是一也便游赭盡而峻城闕二也柱  
梁衣繡士民無褐三也侏儒有餘酒而死士渴四也民  
有饑色而馬有粟秩五也近臣不敢諫遠臣不敢達平  
公曰善乃屏鐘鼓除竽瑟遂與咎犯參治國

說苑  
正諫

繹史 咎犯在文公時又見於此故楊用修云有兩

咎犯但劉中壘復稱介子推相荆欒盈事韓武子此類非一未有確據

晉平公觴客少庠子進炙而髮繞之平公輒殺炮人炮人呼天曰嗟乎臣有三罪死而不自知乎平公曰何謂也對曰臣刀之利風靡骨斷而髮不斷是臣之一死也桑炭炙之肉紅白而髮不焦是臣之二死矣炙熟又重睨而視之髮繞炙而目不見是臣之三死也意者堂下其有翳憎臣者乎殺臣不亦蚤乎

韓子內儲下作晉文公事

衛靈公將之晉至濮水之上稅車而放馬設舍以宿夜  
分而聞鼓新聲者而說之使人問左右盡報弗聞乃召  
師涓而告之曰有鼓新聲者使人問左右盡報弗聞其  
狀似鬼神子為聽而寫之師涓曰諾因靜坐撫琴而寫  
之師涓明日報曰臣得之矣而未習也請復一宿習之  
靈公曰諾因復留宿明日而習之遂去之晉  
晉平公觴之於施夷之臺酒酣靈公起公曰有新聲願  
請以示平公曰善乃召師涓令坐師曠之旁援琴鼓之

晉平公二  
十四年

未終師曠撫止之曰此亡國之聲不可遂也平公曰此  
道奚出師曠曰此師延之所坐與紂為靡靡之樂也及  
武王伐紂師延東走至於濮水而自投故聞此聲者必  
於濮水之上

釋名 登濮師延所作靡靡之樂後出桑  
間濮上之地蓋空國之侯所作也師涓為

晉平公鼓焉鄭衛分其地而  
有之遂號鄭衛之音為淫樂先聞此聲者其國必削不

可遂平公曰寡人所好者音子其使遂之師涓鼓究之  
平公問師曠曰此所謂何聲也師曠曰此所謂清商也  
公曰清商固最悲乎師曠曰不如清徵公曰清徵可得

而聞乎師曠曰不可古之聽清徵者皆有德義之君也  
今吾君德薄不足以聽平公曰寡人之所好者音也願  
試聽之師曠不得已援琴而鼓一奏之有玄鶴二八道  
南方來集於郎門之垓再奏之而列三奏之延頸而鳴  
舒翼而舞音中宮商之聲聲聞於天平公大說坐者皆  
喜平公提觴而起為師曠壽反坐而問曰音莫悲於清  
徵乎師曠曰不如清角公曰清角可得而聞乎師曠曰  
不可昔者黃帝合鬼神於泰山之上駕象車而六蛟龍

畢方並轄

畢方  
神名

蚩尤居前風伯進掃雨師灑道虎狼在

前鬼神在後螭蛇伏地鳳凰覆上大合鬼神作為清角

今主君德薄不足聽之聽之將恐有敗平公曰寡人老

矣所好者音也願遂聽之師曠不得已而鼓之一奏之

有玄雲從西北方起再奏之大風至大雨隨之裂帷幙

破俎豆隳廊瓦坐者散走平公恐懼伏於廊室之間晉

國大旱赤地三年平公之身遂瘡病

韓子  
十過

古文瑣語 晉平公二十三年夢朱熊窺其屏惡之

而疾問於子產對曰昔共工之鄉曰浮游敗於顓頊  
自沈於淮其色赤其言善笑其行善顧其狀如熊為  
天王祟見之堂則王天下者死見之堂下則邦人駭  
見之門則近憂見之庭則無傷今窺君之屏病而無  
傷其祭顓頊共工乎從其言而病間

太平御覽引

齊景公之晉從平公飲師曠侍坐景公問政於師曠曰  
太師將奚以教寡人師曠曰君必惠民而已矣中坐酒  
酣將出又復問政於師曠曰太師奚以教寡人曰君必

惠民而已矣景公出之舍師曠送之又問政於師曠師曠曰君必惠民而已矣景公歸思未醒而得師曠之所謂公子尾公子夏者景公之二弟也甚得齊民家富貴而民說之擬於公室此危吾位者也今謂我惠民者使我與二弟爭民耶於是反國發廩粟以賦衆貧散餘財以賜孤寡倉無陳粟府無餘財宮婦不御者出嫁之七十受祿米不與二弟爭民居二年二弟出走公子夏逃

楚公子尾走晉

韓子外儲右公子  
夏公子尾出走未聞



晉平公問于師曠曰咎犯與趙衰孰賢對曰陽處父欲臣文公因咎犯三年不達因趙衰三日而達智不知其士衆不智也知而不言不忠也欲言之而不敢無勇也言之而不聽不賢也

說苑善說

知悼子卒

晉平公二十五年

未葬平公飲酒師曠李調侍

與君飲也

鼓鐘杜蕢自外來聞鐘聲曰安在曰在寢杜蕢入寢厯階而升酌曰曠飲斯又酌曰調飲斯又酌堂上北面坐飲之降趨而出平公呼而進之曰蕢曩者爾心或開予

是以不與爾言爾飲曠何也曰子邠不樂知悼子在堂  
斯其為子邠也大矣曠也大師也不以詔是以飲之也  
爾飲調何也曰調也君之褻臣也為一飲一食忘君之  
疾是以飲之也爾飲何也曰蕢也宰夫也非刀匕是共  
又敢與知防是以飲之也平公曰寡人亦有過焉酌而  
飲寡人杜蕢洗而揚觶公謂侍者曰如我死則必毋廢  
斯爵也至于今既畢獻斯揚觶謂之杜舉

檀弓下

晉平公問於師曠曰吾年七十欲學恐已暮矣師曠曰

何不炳燭乎平公曰安有為人臣而戲其君乎師曠曰  
盲臣安敢戲其君乎臣聞之少而好學如日出之陽壯  
而好學如日中之光老而好學如炳燭之明炳燭之明  
孰與昧行乎平公曰善哉

說苑建本  
又尚書大傳

晉平公出畋見乳虎伏而不動顧謂師曠曰吾聞之也  
霸王之主出則猛獸伏不敢起今者寡人出見乳虎伏  
而不動此其猛獸乎師曠曰鵲食狴狴一食駮作猖駮猖食虎夫駮之狀有似駮馬今者君之  
驥食豹豹食駮駮食虎夫駮之狀有似駮馬今者君之

出必駮駮馬而出畋乎公曰然師曠曰臣聞之一自誣者窮再自誣者辱三自誣者死今夫虎所以不動者為駮馬也固非主君之德義也君奈何一自誣乎平公異日出朝有鳥環平公不去平公顧謂師曠曰吾聞之也霸王之主鳳下之今者出朝有鳥環寡人終朝不去是其鳳鳥乎師曠曰東方有鳥名諫珂其為鳥也文身而朱足憎鳥而愛狐今者吾君必衣狐裘以出朝乎平公曰然師曠曰臣已嘗言之矣一自誣者窮再自誣者辱

三自誣者死今烏為狐裘之故非吾君之德義也君奈何而再自誣乎平公不悅異日置酒虎祁之臺使郎中馬章布蒺藜于階上令人召師曠師曠至履而上堂平公曰安有人臣履而上人主堂者乎師曠解履刺足伏刺膝仰天而嘆公起引之曰今者與叟戲叟遽憂乎對曰憂夫肉自生蟲而還自食也木自生蠹而還自刻也人自興妖而還自賊也五鼎之具不當生藜藿人主堂廟不當生蒺藜平公曰今為之奈何師曠曰妖已在

無可奈何入來月八日修百官立太子君將死矣至來  
月八日平旦謂師曠曰叟以今日為期寡人如何師曠  
不樂謁歸歸未幾而平公死乃知師曠神明矣

說苑  
辨物

二十二年伐燕

史晉  
世家

二十六年平公卒子昭公夷立

史晉  
世家

春秋戰國異辭卷十

欽定四庫全書

春秋戰國異辭卷十一

右春坊右諭德陳厚耀撰

晉昭公

紀年 晉昭公元年河水赤于龍門三日

中行穆子圍鼓

晉昭公五年

鼓人有以城反者不許軍吏曰

師徒不勤可得城奚故不受曰有以吾城反者吾所甚惡也人以城來我獨奚好焉賞所甚惡是失賞也若所

好何若不賞是失信也奚以示民鼓人又請降使人視之其民尚有食也不聽鼓人告食盡力竭而後取之克鼓而反不戮一人

說苑貴德  
與左氏稍別

中行穆伯攻鼓弗能下餽聞倫曰鼓之嗇夫聞倫知之請無罷武大夫而鼓可得也穆伯弗應左右曰不折一戟不傷一卒而鼓可得也君奚為弗使穆伯曰聞倫為人佞而不仁若使聞倫下之吾可以勿賞乎若賞之是賞佞人佞人得志是使晉國之武舍仁而為佞雖得鼓



將何所用之

淮南子  
人間

昭公六年卒六卿彊公室卑子頃公去疾立

史晉  
世家

頃公

晉襄公

襄當  
作頃

使人於周曰弊邑寡君寢疾卜以守龜曰

三塗為崇使下臣願藉途而祈福焉天子許之

天子  
景王朝

禮使者事畢客出萇弘謂劉康公曰夫祈福於三塗而  
受禮於天子此柔嘉之事也而客武色殆有他事願公  
備之也劉康公乃敝戎車卒士以待之晉果使祭事先

因令楊子將卒十二萬而隨之涉於棘津襲聊阮梁欒

氏滅三國焉

呂覽精諭 左傳昭十七年晉使屠蒯如周請事於洛遂滅陸渾之戎此晉頃公事

非襄公也且莢弘乃景王敬王之大夫亦在晉頃公時

頃公六年周景王崩王子爭立晉六卿平王室亂立敬

王九年魯季氏逐其君昭公昭公居乾侯十一年衛宋

使使請晉納魯君季平子私賂范獻子獻子受之乃謂

晉君曰季氏無罪不果入魯君

史晉世家

十二年晉之宗家祁奚孫叔向子相惡於君六卿欲弱

公室乃遂以法盡滅其族而分其邑為十縣各令其子

為大夫晉益弱六卿皆大

史晉世家  
約左氏文

十四年頃公卒子定公午立

史晉  
世家

### 定公

紀年 晉定公六年漢不見于天十八年青虹見

定公十一年魯陽虎奔晉趙鞅簡子舍之十二年孔子  
相魯十五年趙鞅使邯鄲大夫午不信欲殺午午與中  
行寅范吉射親攻趙鞅鞅走保晉陽定公圍晉陽荀躒

韓不佞魏咄與范中行爲仇乃移兵伐范中行范中行反晉君擊之敗范中行范中行走朝歌保之韓魏爲趙

鞅謝晉君乃赦趙鞅復位

史晉世家

家語 陽虎旣奔齊自齊奔晉

晉定公十一年

適趙氏孔子

聞之謂子路曰趙氏其世有亂乎子路曰權本不在焉豈能爲亂孔子曰非女所知夫陽虎親富而不親仁有寵於季孫又將殺之不克而奔求容於齊齊人囚之乃亡歸晉齊魯二國已去其疾趙簡子好利而

多信必溺其說而從其謀禍敗所終非一世可知也  
晉定公之十四年范中行作亂明年春簡子謂邯鄲大  
夫午曰歸我衛氏五百家吾將置之晉陽午許諾歸而  
其父兄不聽倍信趙鞅捕午囚之晉陽乃告邯鄲人曰  
我私有誅午也諸君欲誰立遂殺午趙稷涉賓以邯鄲  
反晉君使籍秦圍邯鄲荀寅范吉射與午善不肯助秦  
而謀作亂董安于知之十月范中行伐趙鞅鞅奔晉陽  
晉人圍之范吉射荀寅仇人魏襄等謀逐荀寅以梁嬰

父代之逐吉射以范皋繹代之荀躒言於晉侯曰君命

大臣始亂者死今三臣始亂

三臣范中行趙也

而獨逐鞅用刑

不均請皆逐之十一月荀躒韓不佞魏哆奉公命以伐

范中行氏不克范中行氏反伐公公擊之范中行敗走

丁未二子奔朝歌韓魏以趙氏為請十二月辛未趙鞅

入絳盟于公宮其明年知伯文子謂趙鞅曰范中行雖

信為亂安于發之是安于與謀也晉國有法始亂者死

夫二子已伏罪而安于獨在趙鞅患之安于曰臣死趙

氏定晉國寧吾死晚矣遂自殺趙氏以告知伯然後趙氏寧孔子聞趙簡子不請晉君而執邯鄲午保晉陽故

書春秋曰趙鞅以晉陽畔

史趙世家  
畧同左氏

列女傳 范獻子之三子遊於趙氏趙簡子乘馬園中園中多株問三子曰奈何長者曰明君不問不為亂君不問而為中者曰愛馬足則無愛民力愛民力則無愛馬足少者曰可以三德使民設令伐株於山將有馬為也已而閒園示之株夫山遠而園近是民

說一矣去險阻之山而伐平林之株民說二矣既畢  
而賤賣民說三矣簡子從之民果大說少子伐其謀  
歸以告母母喟然歎曰終滅范氏者必是子也夫伐  
功恃勞鮮能布仁乘偽行詐莫能久長其後智伯滅  
范氏

古文瑣語 范獻子卜獵命占之其繇曰君子得龜  
小人遺冠范獻子獵而無得遺其豹冠

佛肸以中牟叛

晉定公十九年

置鼎于庭致士大夫曰與我者



受邑不與我者烹大夫皆從之至于田單田單中牟之邑人也曰義死不避斧鉞之罪義窮不受軒冕之服無義而生不仁而富不如烹褰衣將就鼎佛肸脫屣而生之趙氏聞其叛也攻而取之聞田單不肯與也求而賞之田單曰不可也一人舉而萬夫俛首智者不為賞一人以慚萬夫義者不取我受賞使中牟之士懷耻不義辭賞從處以行臨人不道吾去矣遂南之楚

新序卷八

孔子自衛將入晉

晉定公十九年

至河間趙簡子殺竇犢鳴犢

及舜華

史記作竇  
鳴犢舜華

乃臨河而嘆曰美哉水洋洋乎丘之

不濟此命也夫子貢趨而進曰敢問何謂也孔子曰竇  
犢鳴犢舜華晉之賢大夫也趙氏未得志之先須此二  
人而後從政及其已得志也而殺之丘聞之剗胎殺天  
則麒麟不至其郊竭澤而漁則蛟龍不處其淵覆巢破  
卵則鳳凰不翔其邑何則君子違傷其類者也鳥獸之  
于不義尚知避之況于人乎遂還之衛息于鄆作槃操以  
哀之曰周道衰微禮樂陵遲文武旣墜吾將焉歸周遊

天下靡邦可依鳳鳥不識珍寶梟鳴眷然顧之慘然心  
悲巾車命駕將適唐都黃河洋洋攸攸之魚臨津不濟  
還轅息鄴傷予道窮哀彼無辜翱翔于衛復我舊廬從  
吾所好其樂只且

合家語及  
孔叢子

水經注 孔子適趙臨河不濟嘆而作歌曰狄水衍  
兮風揚波舟楫顛倒更相加歸來歸來胡為斯

晉中行文子出亡

晉定公二十二年晉敗  
范中行氏二子奔齊

過於縣邑從

者曰此嗇夫公之故人公奚不休舍且待後車文子曰

吾嘗好音此人遺我鳴琴吾好佩此人遺我玉環是振  
我過者也以求容於我者吾恐以我求容於人也乃去  
之果收文子後車二乘而獻之其君

韓子說林下  
又說苑權謀

中行寅將亡乃召其大祝而欲加罪焉曰子為我祝犧  
牲不肥澤耶且齊戒不敬耶使吾國亡何也祝簡對曰  
昔者吾先君中行穆子皮車十乘不憂其薄也憂德義  
之不足也今主君有革車百乘不憂德義之薄惟患車  
之不足也夫舟車飾則賦斂厚賦斂厚則民怨謗詛矣

且君苟以祝為有益於國乎則詛亦將為損一人祝之一國詛之一祝不勝萬詛國亡不亦宜乎祝其何罪中

行子乃慚

新序  
卷一

呂氏春秋 范氏之亡也百姓有得鐘者欲負而走

則鐘大不可負以椎毀之鐘況然有音恐人聞之而奪已也遽掩其耳惡人聞之可也惡已自聞之悖矣家語 子路問於孔子曰賢君治國所先者何孔子曰在於尊賢而賤不肖子路曰由聞晉中行氏尊賢

而賤不肖矣其亡何也孔子曰中行氏尊賢而不能  
用賤不肖而不能去賢者知其不用而怨之不肖者  
知其必已賤而仇之怨仇并存於國鄰敵構兵於郊  
中行氏雖欲無亡其可得乎

紀年 晉定公二十八年淇絕于舊衛

三十年定公與吳王夫差會黃池爭長趙鞅時從卒長  
吳

三十一年齊田常弑其君簡公而立簡公弟驁為平公

三十三年孔子卒

史晉世家

三十七年定公卒子出公鑿立

史晉世家

### 出公

晉智伯伐鄭

晉出公七年

齊田恒救之有登蓋必身立焉車

徒有不進者必令助之壘合而後敢處井竈成而後敢

食智伯曰吾聞田恒新得國而愛其民內同其財外同

其勤勞治軍若此其得衆也不可待也乃去之

說苑指武

晉出公十一年智伯伐鄭趙簡子疾使太子毋卹將而

圍鄭智伯醉以酒灌擊毋卹毋卹羣臣請死之母卹曰  
君所以置毋卹為能忍詢然亦愠智伯智伯歸因謂簡

子使廢毋卹簡子不聽毋卹由此怨智伯

史趙世家  
釋史云晉出

公十一年即魯悼之四年也按左傳哀公二十年趙襄  
子稱先臣志父是簡子之卒已久何得此時簡子猶在

史記  
誤甚

中山之國有夙繇者智伯欲攻之而無道也為鑄大鐘  
方車二軌以遺之夙繇之君將斬岸堙谿以迎鐘赤章  
蔓枝諫曰詩云唯則定國我胡則以得是於智伯夫智



伯之為人也貪而無信必欲攻我而無道也故為大鐘  
方車二軌以遺君若斬岸堙谿以迎鐘師必隨之弗聽  
有頃諫之君曰大國為權而子逆之不祥子釋之赤章  
蔓枝曰為人臣不忠貞罪也忠身不用遠身可也斷轂  
而行至衛七日而夙繇亡

晉出公十七年呂覽下賢

智伯將伐仇由

由一作猶地志今太原府孟縣有仇猶城

而道難不通乃

鑄大鐘遺仇由之君仇由之君大說除道將內之赤

章蔓枝

枝一作伯

曰不可此小之所以事大也而今也大

以來卒必隨之不可內也仇由之君不聽遂內之赤

章蔓枝因斷轂而驅至於齊七月而仇由亡

韓子說林下

智伯將襲仇由遺之以廣車故曰將欲取之必固與

之

韓子喻老

智伯欲襲衛乃佯亡其太子顏使奔衛南文子曰太子顏之為其君子也甚愛非有大罪也而亡之必有故然人亡而不受不祥使吏逆之曰車過五乘慎勿內也智

伯聞之乃止

說苑權謀

晉太史屠黍

出公時太史

見晉之亂也見晉公之驕而無德

義也以其圖法歸周

呂覽先識

出公十七年智伯與趙韓魏共分范中行地以為邑出

公怒告齊魯欲以伐四卿四卿恐遂反攻出公出公奔

齊道死故智伯乃立昭公曾孫驕為晉君是為哀公

史

世家約左氏文

索隱曰趙世家云驕是為懿公又年

表云出公十八年次哀公忌二年次懿公驕十七年紀

年又云出公二十三年奔楚乃立昭公之孫是為敬公

世本亦云昭公生扎桓公子雍生忌忌生懿公驕然晉

趙世家及年表並皆不

同何況紀年之誤也

哀公

晉哀公大父雍晉昭公少子也號為戴子戴子生忌忌善智伯蚤死故智伯欲盡并晉未敢乃立忌子驕為君晉國政皆決智伯晉哀公不得有所制智伯遂有范中

行地最強

史晉世家

智伯瑤率趙韓魏而伐范中行氏滅之反歸休兵數年因令人請地於韓韓康子將欲勿與段規諫曰不可不與也夫智伯之為人也好利而驚懷彼來請地而弗與

則移兵於韓必矣君其與之與之彼徂又將請地他國  
他國且有不聽不聽則智伯必加之兵如是韓可以免  
於患而待其事之變康子曰諾因令使者致萬家之縣  
益於智伯智伯說又令人請地於魏宣子欲勿與趙鞅  
諫曰彼請地於韓韓與之今請地於魏魏弗與則是魏  
內自強而外怒智伯也如是弗予其措兵於魏必矣不  
如予之宣子諾因令人致萬家之縣益於智伯智伯又  
令人之趙請蔡皋狼之地趙襄子弗與智伯因陰約韓

魏將以伐趙襄子召張孟談而告之曰夫智伯之為人  
也陽規而陰䟽三使韓魏而寡人不與焉其措兵於寡  
人必矣今吾安居而可張孟談曰夫董闕于簡主之才  
臣也其治晉陽而尹鐸循之其餘教猶存君其定居晉  
陽而已矣君曰諾乃召延陵生令將軍車騎先至晉陽  
君因從之君至而行其城郭及五官之藏城郭不治倉  
無積粟府無儲錢庫無甲兵邑無守具襄子懼乃召張  
孟談曰寡人行城郭及五官之藏皆不備具吾將何以

應敵張孟談曰臣聞聖人之治藏於臣不藏於府庫務修其教不治城郭君其出令令民自遺三年之食有餘粟者入之倉遺三年之用有餘財者入之府有奇人者

奇餘也  
謂閒人

使治城郭之繕君夕出令明日倉不容粟府無

積錢庫不受甲兵居五日而城郭已治守備已具君召張孟談而問之曰吾城郭已治守備已具錢粟已足甲兵有餘吾奈無箭何張孟談曰臣聞董子之治晉陽也公宮之垣皆以荻蒿秸楚牆之有秸高至於丈君發而

用之於是發而試之其堅則雖菌幹之勁弗能過也君曰  
吾箭已足矣奈無金何張孟談曰臣聞董子治晉陽也  
公宮令舍之堂皆以鍊銅為柱質君發而用之於是發  
而用之有餘金矣號令已定守備已具三國之兵果至  
至則乘晉陽之城遂戰三月弗能拔因舒車而圍之決  
晉陽之水以灌之圍晉陽三年城中窠居而處懸釜而  
炊財食將盡士大夫羸病襄子謂張孟談曰糧食匱財  
力盡士大夫羸病吾恐不能守矣欲以城下何國之可



下張孟談曰臣聞之亡弗能存危弗能安則無為貴智矣君失此計者臣請試潛行而出見韓魏之君張孟談見韓魏之君曰臣聞唇亡齒寒今智伯率二君而伐趙趙將亡矣趙亡則二君為之次二君曰我知其然也雖然智伯之為人也麤中而少親我謀而覺則其禍必至矣為之奈何張孟談曰謀出二君之口而入臣之耳人莫知之也二君因與張孟談約三軍之反與之期日夜遣孟談入晉陽以報三軍之反於襄子襄子迎孟談而

再拜之且恐且喜二君以約遣張孟談因朝智伯而出  
遇智過於轅門之外智過怪其色因入見智伯曰二君  
貌將有變君曰何如曰其行矜而意高非他時之節也  
君不如先之君曰吾與二主約謹矣破趙而三分其地  
寡人所以親之必不侵欺兵之著於晉陽三年今旦暮  
將拔之而嚮其利何乃將有他心必不然子釋勿憂勿  
出於口明日二主又朝而出復見智過於轅門智過入  
見曰君以臣之言告二主乎君曰何以知之今日二主

朝而出見臣而其色動而視屬臣此必有變君不如殺之君曰子置勿復言智過曰不可必殺之若不能殺遂親之君曰親之奈何智過曰魏宣子之謀臣曰趙葭韓康子之謀臣曰段規此皆能移其君之計君與其二君約破趙國因封二子者各萬家之縣一如是則二主之心可以無變矣智伯曰破趙而三分其地又封二子者各萬家之縣一則吾所得者少不可智過見其言之不聽也出因更其族為輔氏至於期日之夜趙氏殺其守

隄之吏而決其水灌智伯軍智伯軍救水而亂韓魏翼而擊之襄子將卒犯其前大敗智伯之軍而擒智伯智伯身死軍破國分為三為天下笑

史記  
國策文  
約

智伯索地於魏宣子宣子弗予任章曰何故不予宣子曰無故索地故弗予任章曰無故索地鄰國必恐彼重欲無厭天下必懼君子之地智伯必驕而輕敵鄰邦必懼而相親以相親之兵待輕敵之國則智氏之命不長矣周書曰將欲敗之必姑輔之將欲取之必姑與之君

不如與之以驕智伯且君何惜以天下圖智氏而獨以  
吾國為智氏質乎君曰善乃與之萬戶之邑智伯大悅  
因索地於趙弗與因圍晉陽韓魏反之外趙氏應之內  
智氏自亡

韓子說林 又淮南人  
問語稍畧任章作任登

智伯從韓魏之兵以攻趙圍晉陽之城而漑之城不沒  
者三板絺疵謂智伯曰韓魏之君必反矣智伯曰何以  
知之對曰夫勝趙而三分其地今城未沒者三板白竈  
生鼃人馬相食城降有日矣而韓魏之君無善志而有

憂色是非反何也明日智伯謂韓魏之君曰疵言君之反也韓魏之君曰必勝趙而三分其地今城將勝矣夫二家雖愚不棄美利而偕約為難不可成之事其勢可見也是疵必為趙說君且使君疑二主之心而解于攻趙也今君聽讒臣之言而離二主之交為君惜之智伯出欲殺絺疵絺疵逃韓魏之君果反

說苑權謀  
詳國策

智伯軍敗晉陽身死高良之東

韓子  
喻老

世本 逝遨生莊子首首生武子螢螢生莊子朔朔

生悼子盈盈生文子櫟櫟生宣子申申生智伯瑤

淮南子 張武為智伯謀曰晉六將軍中行文子最弱而上下離心可伐以廣地於是伐范中行氏而滅之矣又教智伯求地於韓魏趙韓魏裂地而授之趙氏不與乃率韓魏而伐趙圍晉陽三年襄子鑽龜筮占兆以視利害謂張孟談曰吾恐不能守矣欲以城下何國之可下孟談乃潛行而出三國陰謀同計以擊智氏遂滅之

韓非子 智伯兼范中行而攻趙不已韓魏反之軍

敗晉陽身死高良之東遂率被分漆其首以為洩器

故曰禍莫大於不知足

說苑智伯厨人亡炙遺而知之韓魏反而不改

淮南子 智伯圍襄子於晉陽襄子䟽隊而擊之大

敗智伯破其首以為飲器

呂氏春秋 張孟談踰城潛行與魏桓韓康期而擊

智伯斷其頭以為觴遂定三家

史記韓魏殺智伯埋於鑿壺之下

智伯囂之時有士曰長兒子魚絕智伯而去之三年將



東之越而道聞智伯囂之見殺也謂御曰還車反吾將  
死之御曰夫子絕智伯而去之三年矣今反死之是絕  
屬無別也長兒子魚曰不然吾聞仁者無餘愛忠臣無  
餘祿吾聞智伯之死而動吾心餘祿之加于我者至今  
尚存吾將徃依之反而死

新序  
卷八

智伯與趙襄子戰于晉陽下而死智伯之臣豫讓者怒  
以精氣能使襄主動心乃漆身變形吞炭更聲襄主將  
出豫讓偽為死人處于梁下駟馬驚不進襄主動心使

使視梁下得豫讓襄主重其義不殺也又盜為抵罪被  
形人赭衣入繕宮襄主動心則曰必豫讓也襄主報而  
問之曰子始事中行君智伯殺中行君子不能死還反  
事之今吾殺智伯乃漆身為癘吞炭為啞欲殺寡人何  
與先行異也豫讓曰中行君衆人畜臣臣亦衆人事之  
智伯朝士待臣臣亦朝士為之用襄子曰非義也子壯  
士也乃自置車庫中水漿毋入口者三日以禮豫讓讓  
自知遂自殺也

說苑復思  
詳國策

十八年哀公卒子幽公柳立幽公之時晉畏反朝韓魏

之君獨有絳曲沃餘皆入三晉

世本懿公生幽公柳紀年敬公十八年魏文

侯初立二十二年敬公卒  
子幽公立與史互異

### 幽公

紀年 幽公七年晉大旱地生鹽九年丹水出反相

擊十年夫人秦嬴賊公于高寢之上魏文侯立幽公

子止是為烈公 史年表云魏誅晉幽公立其弟止

蓋脫字 世本 幽公生烈成公止

十八年幽公淫婦人夜竊出邑中盜殺幽公魏文侯以兵誅晉亂立幽公子止是為烈公

烈公

紀年 晉烈公元年韓武子都平陽趙獻子城洺氏

十九年周威烈王賜趙韓魏皆為諸侯

二十七年烈公卒子孝公頎立

孝公

九年魏武侯初立襲邯鄲不勝而去

十七年孝公卒子靜公俱酒立

靜公

二年魏武侯韓哀侯趙敬侯滅晉後而三分其地靜公

遷為家人晉絕不祀

以上俱晉世家

晉雜錄

晉僖公儉不中禮國人作蟋蟀以刺之欲其以禮自娛

樂也

詩序 詩說云  
唐人相戒之詩

范氏有子曰子華善養私名舉國服之有寵于晉君不仕而居三卿之右目所偏視晉國爵之口所偏肥晉國黜之遊其庭者侔于朝子華使其俠客以知鄙相攻強弱相凌雖傷破于前不用介意終日夜以此為戲樂國殆成俗禾生子伯范氏之上客出行經垆外宿于田更商丘開之舍中夜禾生子伯二人相與言子華之名勢能使存者亡亡者存富者貧貧者富商丘開先窘于饑寒潛于牖北聽之因假糧荷畚之子華之門子華之門

徒皆世族也。縞衣乘軒，緩步濶視。顧見商丘開，年老力弱，面目黧黑，衣冠不檢，莫不賤之。既而狎侮，欺詒，攜挹，揆揆，亡所不為。商丘開常無愠容，而諸客之技，卑憊于戲笑。

模寫收拾備盡

遂與商丘開俱乘高臺于衆中，漫言曰：有

能自投下者，賞百金。衆皆競應。商丘開以為信然，遂先投下。形若飛鳥，揚于地，飢骨無礪。范氏之黨以為偶然，未詎怪也。因覆指河曲之淫隈，曰：彼中有寶珠，泳可得也。商丘開復從而泳之，既出，果得珠焉。衆昉同疑子華。

昉令豫肉食衣帛之次俄而范氏之藏大火子華曰若能入火取錦者從所得多少賞若商丘開往無難色入火自還埃不漫身不焦范氏之黨以為有道乃共謝之曰吾不知子之有道而誕子吾不知子之神人而辱子子其愚我也子其聾我也子其盲我也

古語別

敢問其道

商丘開曰吾亡道雖吾之心亦不知所以雖然有一于此試與子言之曩子二客之宿吾舍也聞譽范氏之勢能使存者亡亡者存富者貧貧者富吾誠之無二心故



不遠而來及來以子黨之言皆實也唯恐誠之之不至  
行之之不及不知形體之所措利害之所存也心一而  
物無迕者如斯而已今昉知子黨之誕我我內藏猜慮  
外矜觀聽追幸昔日之不焦溺也怛然內熱怵然震悸  
矣水火豈復可近哉情辭曲折皆當自此之後范氏門徒路遇  
乞兒馬醫弗敢辱也必下車而揖之宰我聞之以告仲  
尼仲尼曰汝弗知乎夫至信之人可以感物也動天地  
感鬼神橫六合而無逆者豈但履危險入水火而已哉

商丘開信偽物猶不逆況彼我皆誠哉小子識之

列子黃帝

烈士傳 干將為晉君作劍三年而成劍有雌雄天

下名器也以雌劍獻君留其雄者謂妻曰吾藏劍在

南山之陰北山之陽松生石上劍在其中君若覺殺

吾爾生男以告之及君覺殺干將妻後生男名赤鼻

具以告之赤鼻斫南山之松得劍欲往刺之晉君夢


一人眉廣三寸辭欲報仇君覺購求甚急赤鼻乃逃

朱興山中遇客欲為之報乃刎首以奉晉君客令鑊

袁之頭三日三夜不爛君往視之客以雄劍倚擬君  
君頭墮鏤中客又自刎三夜悉爛不可分別葬之名

曰三王塚

列異傳莫邪  
為楚王作劍



春秋戰國異辭卷十一